



JUDICIAL SYSTEM MONITORING PROGRAMME PROGRAMA DE MONITORIZAÇÃO DO SISTEMA JUDICIAL

Komunikado Imprensa

Periodu : Maiu 2010

Pubikasaun : 27 Maiu 2010

Pro Kontra Deputadu PN kona-ba konsultasaun Primeiru Ministru iha Distritu

Deputadu Parlamentu Nasional (PN) iha Tersa 25 Maiu 2010 hatudu pozisaun pro kontra kona-ba programa konsultasaun públiku ne'ebé hala'o husi Primeiru Ministru Kay Rala Xanana Gusmão haleu iha distritu hotu.

Tuir deputadu parlamentu balu konsidera Primeiru Ministru nia programa konsultasaun públiku ne'e hanesan halo kampaña polítiku, no balun fali dehan ne'e atu halo planu estratéjiku atu fo benefisiu ba povu.

Direitór JSMP, Luis de Oliveira Sampaio, haktuir katak pozisaun sira ne'e hotu iha nia "razaun no baze fundamentu polítiku maibé prosesu sira ne'e sai nu'udar lisaun polítiku ba elites sira ba aban bairu. Elitores sira persiza haree no halo avaliasaun ba lala'ok prosesu konsultasaun ne'e lao oinsa, nia vantajem saida no ba sé

Liu tan Sampaio, afirma katak "importante liu mak lideransa polítiku sira bele iha diferensa hanoin, maibe polítiku sira tenke hanoin no konsidera katak interese povu nian tenke hatuur iha sentru objetivu polítiku sá ida deit atu hadia povu Timor Leste nia moris ou povu nia bens estar Timor Leste iha futuru".

Relasiona ho prosesu konsultasaun públiku ne'e, Deputadu Antoninho Bianco no Estanislao da Silva husi bankada oposisaun Fretilin, konsidera konsultasaun ne'e hanesan kampaña polítiku tamba Primeiru Ministru Xanana Gusmão mak mesak koalia deit, no pior liu tan hatete governasaun Fretilin uluk mos halo korupsaun.

Iha parte seluk Deputadu Aderito Hugo husi bankada CNRT no Rui Menezes husi bankada PD kontra no dizkorda ho reasaun deputadu sira opozisau nian, no afirma katak konsultasaun ne'e bazeia ba planu estratéjiku governasaun Aliansa Maioria Parlamentu (AMP) nian hanesan uluk governasaun Fretilin halo programa governasaun aberta. Tanba ne'e la iha kampaña polítiku maibé karik Primeiru Ministru responde pergunta sira ne'ebé mai husi partisipantes no substansia polítiku ne'ebé povu sira preukupa..

JSMP sente haksolok tebes ho dinámika no kultura krítika ne'ebé buras ba bebeik iha Parlamentu Nasional. Maibé JSMP mos hein katak membru sira Parlamentu Nasional servisu hamutuk hodi halo

fiskalizaun ba programa Governu nian atu lao tuir prátika no prinsípiu governasaun diak nu'udar baze ba governasaun administrasaun Estadu nian. Liu tan, JSMP enkoraza distintus deputadu sira hotu kontinua halo kritika no fo hanoin nafatin ba governu hodi konsidera saida mak prioridade entre prioridade sira seluk. Tanba ho kritika no fo hanoin sei fasilita ukun nain sira atu hare buat asuntu balun ne'ebé karik prioridade maibe la tama iha agenda nasional governu nian. JSMP fiar katak ho mekanismu no aprosimasaun sira hanesan ne'e mak bele resolve problema nasional no foti desizaun ne'ebé mak loos no justu hodi fo benefisiu ba povu Timor Lésté.

JSMP mos konvensidu katak kestoins sira estadu nian nunca hetan resposta unika husi individu ka grupu ida nian deit. Maibe kestoins estadu nian *sempre no sempre* persiza resposta ka reseita no kontribuisaun koletivu hosi entidades hot-hotu.

Atu hetan informasaun kle'an favor kontaktu:

Luis de Oliveira Sampaio

Diretor Ezekutivu JSMP

Diresaun e-mail: luis@jsmp.minihub.org

Landline: 3323883